

Erllicher unterschiedlicher Schreiben/da-innen vermeldet wird/  
wie Königl. Maytt. zu Hungarn und Böhmen mit den Schwedischen  
den 5. vnd 6. Septembris dieses 1634. Jahres bey Nordlingen geschlagen/ vnd da  
Feld erhalten. Dabey annecti et ist ein extract zweyer warhafftigen  
Schreiben aus Pohen/ von Warschau/ vom  
11. vnd 13. Septembris, 1634.

Aus dem Königl. Feldlager vor Nordlingen/ den 6. Septembr. 1634.

**W**estern hat sich der Feind aus seinem Lager begeben/ weil er aber  
solches gar oft im krauch gehabt/ haben wir seine intention eher  
nicht erfahren könen/ bis wir mit vnser Reuterey avanzirt/ wel-  
ches aber dermassen schlech beschaffen war/ das es gar keine proporti-  
on zu einer Schlacht gehabt. In deme nu der Feind 1. Biretel vor 4.  
Vhr sehr stark von einer höhe/ alda wir vns seiner im wenigsten nicht  
versehen herab kommen/ die vnserigen a. gefangen zu avanziren vnd  
zutreffen/ auch alsobald 2. Regiment des Feindes zurück getriebe/ weil  
er aber das Fußvolck vnd Tragoner bey handen gehabt/ als sind die  
vnserigen vbel bestanden/ vnd stark zurück zuffen müssen. Als nu Herz  
General Gallas diß ersehen/ hat er vnser Soldaten animiret vñ auff  
die Posten gebracht/ vnd ob wol immerfort scharmuziret/ ist doch nicht  
hauptsächliches vor gegangen/ weil die Nacht eingefallen/ so eine son-  
derliche gnade von Gott gewesen/ dann es war weder vnser Volck bey-  
sammen/ noch die General-Officir bey handen/ sintemal diß gar ein vn-  
verhoffte sache gewesen. In gedachtem scharmuziren sind der vnsern in  
die 400. des Feindes aber mehr geblieben. Auff vnser seithen H. Alde-  
brandin/ Baron Cornet/ Obr Bihle vñ andere. Die Nacht ober sind  
Königl. Maytt. sampt dem Cardinal Infante auff einer höhe/ nicht  
weit von dem Feinde ganz wachsam geblieben/ alda wir auch ein wenig  
gessen/ vnd die Nacht ohne schlaff zubracht/ in zwischen hat der Feinde  
bis auff 1. Vhr inn die Nacht durch den Wald auff einer höhe auff der  
rechten seithen avanziret/ vnd nicht allein den vor ihn gar gutten/ vns  
aber schädlichen Posto/ sondern noch einen höhern Berg einnehmen  
wollen. Weil aber 500. Musquetirer von Spanischem Volck/ die sich  
vber die massen wol gehalten/ im Walde gewesen/ vnd den Fein mit sei-  
ner

ner ganken Armada nicht ohn geringen verlust der feinen/ 3. Stunden  
lang auffgehalten/ als sind enkwischen auff gedachten Berg 5000.  
Mann <sup>Sy</sup> <sup>wir</sup> <sup>ich</sup> <sup>Volck</sup> / sampt 14. kleiner Stücklein commandiree  
worden/ die sich allda verschanket/ dr. Feind aber mit seiner Macht vñ  
Stücken/ nach dem er die vnfrigen 506 Spanier aus dem Walde ge-  
trieben/ hat er sich hernach etwas gefüllet. So bald nu die Nacht ver-  
gangen/ vñd ein heller schöner Tag worden/ hat sich der Feind vmb 5.  
Vhr in der völligen Battaglia präsentiret/ vñd zu dem Berge/ welche  
die Spanier defendiret/ mit macht vñd erschrecklicher Furi avanziret/  
vnser Reuterrey aber haben ihn zurücke in den Wald getrieben/ aus dem  
Wald aber vnser Fußvolck/ alda die Spenier wie Löwen gefochten/  
enkzwischen vnser Reutterey sich gewendet/ auff den Feind gesetzt/ also  
der Rauffhandel angangen. Viel sind der meinung gewesen/ es werde  
keine rechte Schlacht daraus werden. In dem hat der Feind mit Stük-  
cken zuspielen gar starck angefangen/ vñd an das orth/ da Ihr Maytt.  
vñd der Infante gestanden (vñnd zum theil Ordinanz ertheylet/ zum  
theil vmb bericht vñd gutachten zu den Generalpersonen hin vñnd her  
geschicket/ vñd gutte vorsehung gethan) dermassen geschossen/ das die  
Kugeln mit grosser vngestümigkeit zwischen Ihr Maytt. vñd dem In-  
fante durchgangen/ einen schritt hinter Ihr Maytt. den Obristen A-  
hazi getroffen/ das er alsbald tod blieben. Ihr Maytt. aber haben sich  
nicht alein nichts alterirt/ sondern hierzu noch gelachet/ vñnd noch eine  
weil still gestanden/ hernacher aber auff das Pferd gesessen/ vñd auff ein  
andern Posten/ da nicht weniger die Kugeln wacker herumb geflogen/  
heroisch geritten/ das Volck aber hat auffeinander zu 2. vñnd 3. Regi-  
mentern mit einer erschrecklichen Furi/ so wol zu Fuß/ als zu Ross ge-  
troffen/ vñd wegen des Berges gestritten/ in wehrendem Treffen auff  
der andern seiten/ wo sich der Feind gestern präsentiret/ haben etliche  
Regim. seiner Reuterrey avanziret/ alda auch die vnsern/ derer kaum  
1200. von deutscher Reuterrey/ vñd etwa 3000. Erabathen gewesen/  
nicht gefeyert/ vñd als die vnsern angefangen aufzureissen/ hat Hans  
von Werth mit dem deutschen Volcke scharhuret/ vñd des Pahawßky  
Erabaten vnter sie gesetzt/ diese Jagt hat bey einer halben stunde ge-  
wehret/ auff die lezt aber/ da dem Feind bange worden/ vñd angefangt  
aufzureis-

aufzureißen/ hab die Erabaten denselben nachgesetzt/ vnd wie Bänß  
 vnd Krauthäupter geköpffet/ der Succurs aber/ so jhaen zugeschielet  
 worden/ hat nichts helffen wollen/ sintemal eine Troppe die ander ver-  
 hindert/ confundiret/ vnd dadurch eine schreckliche Schlachtbanck ver-  
 bracht worden. Hernach hat der Feind bey dem Wald vnd Berg niche  
 mehr so starck geschossen. Die Spanier haben beherst ohn all vorthail  
 kniend vnd schreyend/ Jesus Maria/ dermassen tapffer auff den Feind  
 gesetzt/ vnd Salve gegeben/ das es sich zuverwundern/ vnd erschrecklich  
 gewesen/ nichts destoweniger hat der Feind tapffer drauff gesetzt/ vnd ob  
 wol seine Reuterer zweymal getrennet worden/ so hat er sich allzeit  
 widerumb recolligiret/ vnd in den Squadronen auff dem Berge vnd  
 vnsern Erabaten gegenüber gestanden/ ciner den andern angesehen/ kei-  
 ne den andern aber angreifen dürffen. Andere vnser Reuter/ so in der  
 tieffe gehalten/ vnd aus gewissen vrsachen nicht avanziret/ in summa von  
 5 bis 11. Uhr zu Mittag ist ein solches schiffen aus Stücken vnd Mus-  
 queten gewesen/ das gar die Luft trübe worden/ vnd vnmöglich ist  
 aufzuschreiben/ was es für ein starckes Treffen gewesen. Nach diesem  
 haben die vnsern in dem Walde dermassen auff den Feind gesetzt/ das  
 er hauffenweise weichen müssen/ deme vnser Reutter starck nachgesetzt/  
 hernach aber vom starcken schiffen ihrer Musquetirer etwas zurücke ge-  
 halten worden/ bis 2 Regim. Fußvolck den vnserigen zuhülffe kommen/  
 dan wider drauff gesetzt vnd dermassen durchgedrungen/ das des Fein-  
 des Reuterer den Wald von einer/ die Spanier von der andern seiten  
 vmbfangen/ die dritte Parthey aber durch den Wald gejaget/ vnd ein  
 solches Blutbad vnd Jagt gehabt/ das es erschrecklich zuschreiben ist/  
 gleich dieselbe stunde als die Post ankommen/ haben Ihre Maytt. vnd  
 Card. Infante neben vns allen einer Messe vnter einem Zelt beyge-  
 wohnet/ nach der Messe vnd absolvirung vnser lieben Frauen Litani/  
 sind wir an das Orth/wo die Meck vnd Schlachtbanck am schärfßten  
 gewesen/ geritten/ alda man Ihr Königl. Maytt. viel Fahnen vnd  
 Cornet präsentiret/ das ichs fast nicht schreiben darff. In wehrendem  
 Treffen vnd nachsetzen hat sich Don Luyse Gonzaga dermassen wolge-  
 halten/ das er 15. Fähnlein bekommen/ ingleichen andern mehr/ von  
 denen ich zum theyl selbst nicht weiß/ vnd zum theyl zuschreiben nit  
 habe.

4 habe Summa sie haben sich alle wol gehalten/ die Spanier aber zum besten/ sintemal der Feind am meisten auff sie gedrungen/ vnd sie am meisten fechten müssen/ auch esliche vornehme Officierer dabey verlohren. Es ist von beyden seiten ein ziemlich warmes Bad gewesen. Des Feindes Fußvolck ist ganz außgetilget/ 4. Regim. gar niedergehauen/ die andern zertrennet vnd gefangen/ wir haben auch 40. stück vnd alle Fahnen bekommen. Der Fahnen so ich selbst gesehen sind bey 120. Der Cras/ Lorenz Hoffkirch in gleichen der Horn ist gefangen. Der Weymar sol hart beschädiget/wo nicht gar auff der Wallstadt gebliebē sein. Der todten Körper sind dermassen viel/ das einem grausen vnd schaueren thut/vnter denen viel Abdeliche/schöne vnd vornehme Leuth gefunden werden. Des Hoffkirchs Sylbergeschmeid haben die Crabaten bekommen. An jeso im Walde sehen dem Feinde 5. Regim. nach/ haucen nieder was sie antreffen. Der gefangenen vornehmen Officierer sind gar viel vorhanden/von denen vnd andern Particularien ich jeso nicht Zeit habe zuschreiben.

Aliud vom 6. Septembris.

**D**er Feldm. Leutenandt Götz hat des Feindes Linken Flügel angegriffen vnd völlig in die Flucht geschlagen. Die Infanteria 10000 Mann/ist ganz ruiniert. Des Weymars Scherpe/ so er heut getragen/ ist in vnsern händen/vnd sagt der Horn/ er/ Weymar sey todt. Wir haben albereit 41. Stück vnd 40. Munition wägen bekommen. Aldobrandin vnd Tornetto sind todt blieben. Obr. Mactin verwundt/doch nicht tödtlich/so dann vmb 5. oder 6. Uhr Abends geschehen. Hoffkirchen damals verwundt/ vnd den andern Tag von den Croaten in seiner Kutsch gefangen. Frühe stracks im anfang ist der Feldm. Leutenandt Bihle mit einem Stücke getroffen worden. Graff Solentin von Solm mit 7. tödtlichen stichen verwundet/ thut ohne Verstandt vnd Sprache liegen. Der Weymar hat am ersten angefangen zuweichen/denn der Horn auch bald gefolget/ darauff die vnsern die Infanteria umbringet. Gen. Major Tagstein ist gefangen. Von der Reuterey bringt man noch Tropfenweise gefangē viel Standarden vnd Fahnen. Carolus 5. hat auch bey Nördlingen den Schmallaldischen Bund in die Flucht gebracht/ den Feind biß an die Elbe

5  
Elbe verfolget/ vnd den Churfürsten von Sachsen bey Mielberg gefangen. Item berichtet mündlich H. Markes Don Hambal Gonzaga/ daß der Feind den Tag vor der Schlacht alle seine Bagagewägen gegen Lawingen neben 2000 Württembergischen LandPauern zur Conuoy geschickt/ so von den Crabaten 2. Meyln von hier ange-  
troffen/ weren die Pauern zertrunnet/ viel niedergeh. ut/ vnd die Bagagewägen alle spoliret worden/ vnd hetten die Crabathen gutte Beu-  
the bekommen.

Barhaffte Relation von dem Treffen bey Nördlingen/  
den 26. 27. Augusti/ 5. vnd 6. Septemb.  
vorgegangen

Welcher gestalt der König in Hungarn mit den Kayserl. vnd  
Bayrischen Armeen/ (mit denen sich auch den 23. Augusti 2.  
Septemb die ganze aus Italia ankommende Spanische vñ  
Italianische Force conjungiret) der Stad Nördlingen eine gutte Zeit  
hart zugesetz/ auch wie daß Herrn Feldm. Horns Erzell. vnd Herzog  
Bernhardts Fürstl. Gn. Armeen zu Bopffingen sich logiret/ einen  
Succurs nach Nördlingen gebracht/ vnterschiedliche glückliche Re-  
contres mit dem Feinde gehabt/ zu besagtem Bopffingen sich zuver-  
schanken angefangen/ vnd allda des H. General Keingrafens/ vnd  
Herzog Wilhelms Fürstl. Gn. Troupen erwarten wollen/ in der In-  
tention/ alsdann ihr Glück mit Gott zutentiren/ vnd die gutte Stadt  
Nördlingen zuentsetzen/ ist alles aus den nechstvergangenen Auisen zu-  
sehen/ Num. 33. Nach dem aber auff der Spanier ankunfft beneldtem  
Nördlingen je mehr vnd mehr mit schiffen/ Granaten einwerffen vnd  
stürmen zugesetz worden/ vnd zwar die Belagerten sich tapffer vnd v-  
beraus heroisch erwiesen. So haben Ihr Fürstl. Gn. Herzog Bern-  
hard/ vnangesehen weder der H. Keingraff noch Herzog Wilhelms  
Fürstl. Gn. Troppen/ sondern allein H. Graff Craß mit seinem Volck  
im Läger angelanget/ nebenst der andern H. Generaln Resolution in  
Gottes Namen angefangen eines Berges/ der des Feindes Läger com-  
mandiret/ sich zubemächtigen/ darauff die stücke zu pflancken/ den Feind  
in seinem Läger zu Canoniren vnd delogirend zumachen/ zu dem En-  
de sie Dinstags den 26. diß auffgebrochen/ legen dem Feind avanzirt/  
vnd

6 vnd mit der Cavalleria gegen Abend am ersten in die Spanische gera-  
then/welche sie auch alle vber halß vber Kopff reponiret/ den General  
Aldobrandini todts geschossen/vnd von denselben 12. Standarden ero-  
bert/ vnd sie dermassen in Confusion gebracht haben daß nechst Got-  
tes hülffe/wann die Nacht nicht eingefallen/ man die erwünschte Vi-  
ctoriam in händen gehabt. Folgende Mittwoch mit anbrechendem tag-  
ge/ist das Scharmuzren wider angangen/ vnd war es omb obberür-  
ten Berg zuthun/vnangesehen ob schon der Feind 300. commandirte  
Spanier in einen Wald gesteckt/welche die vnsern sehr incommodiret/  
so sein jedoch dieselbe/ nach dem man vergeblich solche aus dem Walde  
zujagen vermeinet/endlich alle darinn niedergemacht/ vnd Obr. Ma-  
jor gefangen worden/mittlerweil haben Ihr Excell. Feldmarsch. Horn  
mit der Infanteri zum theyl des Berges sich bemächtiget/ 6 stück Ge-  
schüs darauff bracht/vnd in des Feindes Lager zu Canoniren angefan-  
gen/vnd nicht allein grossen schaden gethan/sondern auch verursachet/  
daß der Feind sein Geschüs vor Nördlingen abgeföhret. In dieser A-  
ction haben vnser Knechte des Feindes Lager/ so mit einer Brustwehr  
versehen/ angefallen/an vnterschiedlichen Orten erstiegen/etliche Fahn-  
nen herauß genommen/vnd zurücker bracht. Als aber der Feindt hier-  
zwischen seine ganze Nacht zusammen bracht/ vnd mit derselben auff  
die vnsern gangen/ auch mit Canonen vberaus starck gespiellet/ ist man  
endlich gezwungen worden sich zureteriren/ so aber mit guter Manier  
vnd Ordre beschehen/ allein sind die Erabaten vnd Bngarn in die Re-  
troquarde gefallen/das darüber die Infanteri (weil sie wegen Ungele-  
genheit des Orts/von der Cavalleri nicht hat können secundiret wer-  
den) angefangen in Disordre zukommen/vnd theyls die Bewehr hin-  
weg geworffen/vnd nach den Wälden sich salbiret/ die Cavalleri aber  
hat sich nach außgestandenem Treffen meistens theyls mit gutter Ord-  
nung vnd fliegenden Standarden reteriret: Die Stück aber/ weil die  
Artoleri Pferde außgerissen/ seind im stich blieben Die Pagagi ist  
theyls von Freunden/ theyls von Feinden geplündert worden. Den  
Verlust am Volck helt man nicht sonderlich groß/ wie sich denn täg-  
lich Reiter vnd Fußknechte hauffenweise wider findet/ vnd meinet  
man nicht/das vber 500. Mann zu Fuß auff der Wallstadt geblieben.

Gewick

7

Gewiß aber ist/ daß der Feind keine Sende darbey gesponnen / vnd  
 gewiß mehr Volck dann die vnsern im Treffen verloren: allein hat der  
 Feind dismal durch Gottes Verhängnüß das Feld erhalten. Vnser  
 rer seiten ist Gen. Leutenampt H. von Hoffkirchen den 1. Tag in ein  
 Arm geschossen vnd nach Blm geführet worden Andern Tages sind  
 in Treffen blieben/ Marggraff Friedrichs zu Onolsbach Fürstl. Gna.  
 Obr. Leutenampt/ vnd der alte Wittberg: Obrist. Leuten. Dellings-  
 hausen sein mit einem Stück beyde Schenckel abgeschossen: Landgraf  
 Johansen zu Hessen Fürstl. Gn. in ein Arm gehauen / vnd Obrister  
 Wachmeister gefangen worden Wer an des Feindes seiten geblieben  
 wird man mit nechstem vernehmen. Herzog Bernhards Fürstl. Gna.  
 befinden sich Dato zu Constad/ vnd H. Feldmarschalck Horn zu Blm/  
 die Dispandirte Troupen zucolligiren. Dis ist der warhafftige Ver-  
 lauff von obberürtem Treffen/ so man noch zur zeit von glaubhafften  
 Personen haben kan/ so mit vnd darbey gewesen. Die eygentlichen  
 Specialien folgen mit nechster Relation. Nördlingen sol sich noch  
 halten/ der Commendant hette Vertröstung gethan (nechst Göttliche  
 assistens) den Feind noch in 2. Wochen auffzuhalten. Der Feind soll  
 mit theyls seiner Arme auffbrocht sein/ theyls aber zur continua-  
 tion der Belägerung hinterlassen haben.

Aus Pohlen von Warschau/ vom 13. Septembr.

Ihre Königl. Maytt. sind selber heute in Person/  
 vnd 2. seiner H. Brüder Prinzen Casimir vnd  
 Alexander auffgebrochē nach der Reuschen Lemberg/  
 von dannen weiter in Podolien wider den Türcken.  
**GOTT** gebe dem tapffern Könige Glück wider den  
 Erbfeind. Der H. Großfeldher Konez polski ligt an  
 der Walachischen Gränge/ am Fluß Niester/ wil des  
 Feindes in der Walachey warten / hat schön muttig  
 Volck. Der Türck ist disseits der Dohnaw 100000.  
 Mann starck/ giebet Friedenstractaten vor/ die Po-  
 len aber wollen nicht trawen / sondern sind parat zu  
 schlagen vnd zu tractiren.

Item.

